

SURANA PAUL TO JAMA'A I EFESUS

POGAU BHAA-BHAANA

I nuncana *Surana Paul to Jama'a i Efesus*, Paul moburina sura sii apogauaka Haejatina Aulata'ala mamudhaakana "Bhari-bharia giu modhaangiana i sorogaa atawa modhaangiana i dunia, apaposaangua tee Al Masi to moka-palaia," (1:10). Sura incia sii uka satotuuna amembali parinta to uumatina Aulata'ala mamudhaakana manga incia adhikaia i nuncana ngangarandana o ma'anana haejati momaoge minaaka i Aulata'ala to mopaposaangua bhari-bharia uumatina maanusia alaloi Isa Al Masi.

I weta i bhaa-bhaana surana Efesus sii apogauaka tuaapa o paposaanguana giu incia sumai bheamembali. To apogauaka giu incia sumai, Paul apatulatulaakea tuaapa o Aulata'ala padhamo apili uumatina, tuaapa o Aulata'ala alaloi Isa Al Masi o Anana, a'amponi tee apabebasi uumatina minaaka i dosa, tee tuaapa o janjina Aulata'ala sumai atanggoa Rohina Aulata'ala. I weta rua anguna, aparintaakea to manga mobacea mamudhaakana manga incia adhadhi apomaamaasiaka mamudhaakana o giu iposaanguakana manga incia momembalina uumati moparacaeana tee Al Masi amembali atopewau.

To asusuaka ande o uumatina Aulata'ala aposaanguamo roonamo aposaangu tee Al Masi,

Paul moburina sura sii apake pia-pia angu ibarati. Jama'a satotuuna mboomo bada, tee Isa Al Masi mboomo bhaana, atawa mboomo saangu bhanua, bhatuna sandina siitumo o Al Masi, atawa uumatina Aulata'ala mboomo samia bhawine tee Isa Al Masi momembalina uma-nena. Paul amasanaa mpuu incana wakutuuna audhani rahumatina Aulata'ala alaloi Al Masi, sabutuna manga bhoasaka ipakena i nuncana surana apatokamataaka ande o ngangarandana ampuu-mpuu tee asukuru tee apuji Kawasana Opu. Bhari-bharia iburina sii akamatea minaaka i kaasina Al Masi, minaaka i opea ikurubani-akana Isa, i'amponina Isa, kalapena incana tee kangkiloni Isa.

Antona

Porikanaana pogau 1:1-2

Al Masi tee garejana 1:3--3:21

Dhadhi bhaau tamembali Karasiteni 4:1--6:20

Katutubhi 6:21-24

Salamu

1:1-2

¹ Minaaka i Paul, momembalina rasuluna Isa Al Masi roonamo kapeeluana Aulata'ala. To bhari-bharia mia mosaalihi i Efesus, siitumo manga mia moparacaeana tee Isa Al Masi.

² Rahumati tee dhadhi malape minaaka i Aulata'ala o Amata, tee minaaka i Isa Al Masi Oputa Momalanga, apoose tee ingkomiu.

Kabarakati to Manga Mia Motopili

1:3-14

³ Bhari-bharia kapujia to Aulata'ala o Amana Isa Al Masi, Oputa Momalanga mopadhana mobarakatina rohita tee bhari-bharia kabarakati minaaka i sorogaa alaloi Isa Al Masi.

⁴ Aulata'ala padhamo mangapili alaloi Al Masi wakutuuna o dunia sii indapo atopadhaangia mamudhaakana tamangkilo tee inda tee balacita i aroana.

⁵ I nuncana kaasina, ingkita padhamo mangapili minaaka i bhaa-bhaana alaloi Isa Al Masi to tatoangka tamembali manga anana apokana tee kapeeluana,

⁶ mamudhaakana atopuji o kamuliangina rahumatina mopadhana ibarakatiakana to ingkita alaloi Anana imaasiakana.

⁷ Sababuna o Aulata'ala mangatolosi rampaakanamo raana Al Masi, siitumo bhari-bharia dosata a'amponia apokana tee kaogena rahumatina,

⁸ idhawuakana motaralabhi-labhi to ingkita alaloi hikimati tee akalana budi momalape.

⁹ Aulata'ala uka mangapaumbaaka rahasiana kapeeluana tee relana totona incana, siitumo haejatina mopadhana ipatotapuakana alaloi Al Masi.

¹⁰ Haejatina Aulata'ala sumai siitumo mamudhaakana bhari-bharia giu modhaangiana i sorogaa atawa i dunia, apaposaangua tee Al Masi to mokapalaia, tee o giu incia sumai bheapamondoa Aulata'ala ande akawamo o wakutuuna.

¹¹ Aulata'ala akarajaa opeapo uka aose kapeeluana tee kambotuna karon. Minaaka

i bhaa-bhaana Incia padhamo mangapili, roonamo Incia gauna tamembali uumatina roonamo taposaangu tee Al Masi,

¹² mamudhaakana ingkita mobhaa-bhaana moharapuna tee Al Masi, tamembali tapuji Aulata'ala rampaakanamo kamuliangina.

¹³ Roonamo wakutuuna ingkomiu urango kasameana mobanara, siitumo Lele Malape mopasalaamatikomiu sumai, ingkomiu uparacaea tee Isa Al Masi. Kasiimpo apokana tee janjina, Aulata'ala adhawuakakomiu Rohina Aulata'ala Momangkilo ijanjiakana amembali materaina ande ingkomiu umembalimo pewauana.

¹⁴ Rohina Aulata'ala sumai momembalina jamina ande ingkita bhetatarima tinauraka mopadhana ijanjiakana Aulata'ala to uumatina. Giumo incia sumai mangapayaakinina ande o Aulata'ala bheapabebasi uumatina mamudhaakana ingkita bhetapujia rampaakanamo kamuliangina!

Do'ana Paul

1:15-23

¹⁵ Rampakanamo sumai, sarangoku ande ingkomiu uparacaea tee Isa Oputa Momalanga tee umaasiaka bhari-bharia manga mia mosaalihi,

¹⁶ iaku indamo kuunto-unto kuemaniakakomiu sukuru i Aulata'ala, tee sadia kuudhani saromiu i nuncana do'aku.

¹⁷ Iaku kudo'a i Aulata'alana Isa Al Masi Oputa Momalanga, siitumo o Amata momulia to arahumatiakakomiu Rohina hikimati tee wahiyyu mamudhaakana u'aarifu tee uhanda umatau Aulata'ala.

¹⁸ Iaku uka kudo'a mamudhaakana o Aulata'ala asuluwi totona incamiu, sabutuna umataua opea iharapumiu minaaka i kakembana, tee uka mamudhaakana umataua tapanamo kabhari o tinauraka momulia mopadhana ipasadiaakana Aulata'ala to manga mia mosaalihi,

¹⁹ tee tapanamo kaoge o kuasana to ingkita moparacaeana tee Incia. Kuasana Aulata'ala sumai apokana mboomo wakutuuna kakaana inda momentela asusuakea,

²⁰ ipakena wakutuuna Aulata'ala apadhadhi pendua Al Masi minaaka i mate tee adhawuakea kauncuramaka momalanga kasiimpo adhikaia i weta kaanana i sorogaa.

²¹ Kauncuramakana sumai alabhi o kalangana minaaka i kauncuramakana sagala pamarinta, sagala mia mokokuasa, sagala kapala, sagala opu tee saron a incemapo uka mopadhana idhawuaka kauncuramaka momalanga, malape modhadhina i zamani sii-sii atawa modhadhina i zamani bhemoumbana naile itu.

²² Aulata'ala adhika bhari-bharia giu i tambena aena Al Masi, tee o Aulata'ala padhamo apatotapuakea to amembali kapalana bhari-bharia giu to manga jama'a.

²³ Manga jama'a sumai satotuuna o badana Al Masi, tee alaloi Incia mangapabukeaka Rohina. Incia uka mopabukena bhari-bharia giu i iapaipo uka.

2

*I Piamo itu Tamatemo maka Sii-sii Tadhadhimo
Taposaangu tee Isa Al Masi*

2:1-10

¹ I piamo itu ingkomiu umatemo, roonamo manga kasalaha tee dosa

² momenturuna ipewaumiu wakutuuna uose kananeana dunia sii tee uta'ati i raja mokuasaina pamarintana laiana, siitumo seetani mokuasaina ngangarandana manga mia modorohaka.

³ I piamo itu bhari-bharikita tapokana tee manga incia, ingkita tadhadhi taose kapeeluna maanusia tee nawusuuta, tee fikiri inda momalape. Wakutuu incia sumai o kadhaangiata apokana tee manga mia mosagaanana, siitumo tamembalimo mia ikangkanaina pamuruna Aulata'ala.

⁴ Maka rampaakanamo kaogena kaasina tee ingkita, Aulata'ala mobukeakana rahumati sumai,

⁵ mangapadhadhi pendua tapobhawa tee Al Masi, moomini ingkita tamate rampaakanamo manga kasalahata. Jadi o rahumatina Aulata'ala mopasalaamatikomiu.

⁶ Roonamo ingkita taposaangu tee Isa Al Masi, Aulata'ala mangapadhadhi pendua tapobhawa tee Incia, tee mangadhika tapobhawa-bhawa tee Incia i nuncana sorogaa,

⁷ mamudhaakana i zamani bhemoumbana naile itu, Incia amembali apatokamataaka rahumatina momaoge sumai to ingkita; siitumo Aulata'ala asusuaka kalapena incana to ingkita alaloi Isa Al Masi.

⁸ Jadi rampaakanamo rahumati, ingkomiu utopasalaamati roonamo uparacaea tee Al Masi.

Kasalaamatimiu sumai mencuana usaha minaaka i karomiu, maka minaaka i rahumatina Aulata'ala,

⁹tee mencuana rampaakanamo amalamiu, jadi inda dhaangia o mia momembalina mosomboakana karona roonamo amalana sumai.

¹⁰Roonamo ingkita sii ikarajaana Aulata'ala, mangapadhaangia i nuncana karona Isa Al Masi to tapewauaka karajaa momalape, ipasi-apuakana minaaka i piamo itu; gauna Incia mamudhaakana tadhadhi i nuncana karajaa momalape sumai.

Tatopaposaangu i nuncana Al Masi
2:11-22

¹¹Manga witinai inda motolentuna miana Yahudi! Udhania o kadhaangiamiu i piamo itu. Manga miana Yahudi asarongikomiu o mia inda mototandaki, sainamo manga incia asarongi karona mia mototandaki. Tandaki tangkanamo saangu tanda ikarajaana limana maanusia i badana to asusuaka pokaiana tee Aulata'ala.

¹²Wakutuu incia sumai o dhadhimiu indapo aposaangu tee Al Masi; ingkomiu uto-gaati minaaka i uumatina Israel tee inda upe-sua i nuncana pojanjia ikarajaana Aulata'ala tee uumatina. Ingkomiu udhadhi i dunia sii inda tee iharapumiu tee inda upomatau tee Aulata'ala.

¹³Maka sii-sii, i nuncana karona Isa Al Masi, ingkomiu "momaridhona" i piamo itu sii-sii "umakasumo" rampaakanamo raana Al Masi,

¹⁴roonamo Incia mangadhawuna dhadhi malape. Incia padhamo apaposaangu manga miana Yahudi tee manga mia inda motolentuna

miana Yahudi amembali saangu uumati, tee apatobhata rindi mangapapogaana, siitumo giu ipomusu-musuakata.

¹⁵ Mateana Isa Al Masi apabatala bhari-bharia parintana tee tuturana Hukumuna Taurati, mamudhaakana rua-rua kolompona mia sumai amembali maanusia mobhaau. Tee mboo sumai rua kolompoo amembali apomalape.

¹⁶ Rampaakanamo mateana atoloe i kau salib, Al Masi apaposaangu rua-rua kolompona mia sumai i nuncana saangu bada, tee apapomalapea tee Aulata'ala, sabutuna indamo dhaangia o pomusu-musua sumai.

¹⁷ Incia aumba apakawaaka Lele Malape to papomalapea sumai to ingkomiu, malape to ingkomiu "momaridhona" atawa to manga incia "momakasuna,"

¹⁸ roonamo tee potoloweana Isa Al Masi, bhari-bharikita, malape miana Yahudi atawa o mia inda motolentuna miana Yahudi, tapotibhaaka dhala to tapoaro tee Ama alaloi saangu-anguna o Rohina Momangkilo.

¹⁹ Rampaakanamo sumai, ingkomiu mencuanamo mia dhaga atawa o mia moumba, maka sii-sii upokanamo tee manga mia mosaalihi umembalimo uumatina tee miana bhanuana Aulata'ala,

²⁰ ipakakaro i bhawona fondasina manga nabii tee manga rasulu, tee Isa Al Masi amembali bhatu parapuu mopekatangkana fondasi sumai.

²¹ Incia mosau-sauna saangua bhanua sumai to apamembalia Baitulla Momangkilo to Kawasana

Opu.

²² I nuncana Karona uka ingkomiu upobhawa-bhawa utobhangu umembali tampana mboore-sana Aulata'ala alaloi Rohina.

3

Kakembana Paul to Amembali Rasulu to Manga Mia Inda Motolentuna Miana Yahudi

3:1-13

¹ Iaku o Paul, siitumo sababuna iaku kutorongku rampaakanamo Isa Al Masi to ingkomiu manga mia inda motolentuna miana Yahudi.

² Inciamo ingkomiu padhamo urangoa o tugasiparacaeaakana Aulata'ala to iaku to kupakawaaka rahumatina to ingkomiu.

³ Rahasia incia sumai apakawaakea to iaku alaloi wahiyuu, mboomo kaburi momampodho mopadhana iburiku i bhawo sii.

⁴ Ande ubacea, ingkomiu umembali uma'anai opea ifahamuku to rahasiana Al Masi.

⁵ Rahasiana sumai inda apaumbaakea to manga mia minaaka i zamani mangenge, maka sii-sii apaumbaakamea alaloi Rohina Aulata'ala to manga rasuluna momangkilo tee manga nabina.

⁶ Ma'anana rahasia incia sumai satotuuna: Alaloi Lele Malape sumai, manga mia inda motolentuna miana Yahudi aose anamisi manga kabarakati mopadhana ipasiapuakana to manga miana Yahudi, tee manga incia amembalimo mboomo saangu bada tee manga miana Yahudi

mamudhaakana apokana aose tee atarima opea ijanjiakana Aulata'ala alaloi Isa Al Masi.

⁷ Iaku kumembali bhatua ipatugasiakana to kupakawaaka Lele Malape sumai, rampaakanamo kuasa tee kalapena incana, Aulata'ala adhawuakaaku rahumati mokarajaana i nuncana karoku.

⁸ Minaaka i tanga-tangana mia mosaalihi, iaku o mia tapanamo mohinana mpuu minaaka i tanga-tangana manga mia mosaalihi. Maka o Aulata'ala adhawuakaaku rahumatina mamudhaakana kupakoleleaka manga kabarakati idhawuakana Al Masi inda motokera-kera sumai to manga mia inda motolentuna miana Yahudi,

⁹ tee uka kupetulatulaakea to bhari-bharia mia o rahasia ibuniakana Aulata'ala mopadhaangiana alamu minaaka i auwalina dunia,

¹⁰ mamudhaakana sii-sii alaloi jama'a apakoleleakea o hikimatina Aulata'ala to manga kaogesa tee manga mokenina kuasa i sorogaa.

¹¹ Giu incia sumai apokana tee haejatina mobakaa, mopadhana ipatotapuakana alaloi Isa Al Masi, Oputa Momalanga.

¹² Roonamo taposaangu tee Al Masi, ingkita tamembali tabarani tee tabukeaka kayaakini to tapoaro tee Aulata'ala, siitumo alaloi iimanita tee Incia.

¹³ Rampaakanamo sumai, iaku kuemani tee ingkomiu mamudhaakana inda amate o akalamiu pokaiana tee sagala giuna kanarakaa inamisiku to kutulungikomiu, roonamo giu incia sumai amembali kamuliangimiu.

*Do'ana Paul**3:14-21*

¹⁴ Rampaakanamo sumai, iaku kusuju tee kudo'a i aroana Ama.

¹⁵ Minaakamo i Incia bhari-bharia lipu modhaangiana i nuncana sorogaa tee i dunia atarima saron.

¹⁶ Iaku kudo'a mamudhaakana apokana tee karangkaeana kamuliangina tee uka kuasana alaloi Rohina arahumatiakakomiu kakaa i nuncana baatinimiu,

¹⁷ tee mamudhaakana alaloi iimanimiu, Al Masi amboore i nuncana ngangarandamiu. Iaku kudo'a uka mamudhaakana ingkomiu utopakaro tee ukokulese i nuncana kaasi, mboomo kulesena puuna kau atawa o bhanua i bhawona fondasi momatangka,

¹⁸ mamudhaakana ukokapooli upobhawa-bhawa tee bhari-bharia mia mosaalihi momembalina moma'anaina ande tapanamo kaewana, kaaratena, kalangana, tee uka tapanamo kandalana o kaasina Al Masi sumai

¹⁹ moomini amaoge laulauna to tafahamua bhari-bharia. Iaku kudo'a mamudhaakana ingkomiu umembali umataua o kaasina Al Masi sabutuna ingkomiu ubukeaka tee bhari-bharia kamondona Aulata'ala.

²⁰ To Aulata'ala momembalina mopewauna opeapo uka molabhina kabharina minaaka iemanita atawa ifikirita, tee apokana tee kuasana modhaangiana i nuncana karota,

²¹ to Inciamo o kamuliangi i nuncana jama'a alaloi Isa Al Masi, sakawana aahirina zamani tee sa'umurua to bhari-bharia siwuluna! Amin.

4

Posaanguana Jama'a tee Rahumati Moposala-sala

4:1-16

¹ Rampaakanamo sumai, iaku kutotorongku roonamo Kawasana Opu. Iaku kuemani mpuu mamudhaakana o dhadhimiu apokana tee kakemba itarimamiu to umembaliaka uumatina Kawasana Opu.

² Ingkomiu tabeana sadia upaporitambe karomi, bhoasakana pogaumi upekalulua, tee usabara. Susuakea o kaasimiu tee upoma'ama'afuakamo podho-podho ingkomi.

³ Tee uka u'usahamo to udhadhi malape uposaangu tee Rohina Aulata'ala alaloi dhadhi pomalape.

⁴ Tangkanamo dhaangia saangu o bada, tee saangu o Rohi --- mboomo tuaapa ingkomi utokemba i saangu kaharapu wakutuuna ingkomi utokemba ---

⁵ saangu Opu Momalanga, saangu iimani, saangu kapapebhahoka,

⁶ tee saangu Aulata'ala tee Amana bhari-bharia mia. Incia dhaangia i bhawona bhari-bharia giu tee apewau alaloi bhari-bharikita, tee amboore nuncana bhari-bharikita.

⁷ Al Masi padhamo mangadhawuaka rahumati to ingkita samia-samia apokana tee kapeeluana kadhawuna.

⁸ Rampaakanamo sumai i nuncana Kitabi Zaburuna Nabii Daud atoburi,

"Wakutuuna Incia apene i tampa moma-
langa, Incia abhawa bhari-bharia mia mo-
totaangi;

Incia apekadhawuaka sagala giuna kadhawu
to maanusia."

⁹ (Opea o ma'anana pogauna Nabii Daud, "Incia
apene"? Ma'anana ande Incia uka padhamo
asapo i tampa moporitambena mpuu i dunia sii.

¹⁰ Incia mosapona sumai satotuuna Incia mope-
nena sakawana i kalangaana mpuu mobha-
woakana bhari-bharia laiana, to apamondoaka
bhari-bharia giu i saangua alamu sii.)

¹¹ Incia uka modhawuakana manga kadhawu to
uumatina, dhaangia iangkana amembali manga
rasulu, dhaangia momembalina manga nabii,
dhaangia mopakawaakana Lele Malape, tee
dhaangia uka iangkana momembalina moka-
palaina jama'a tee manga guru to moadharina
jama'a.

¹² Giu incia sumai apewaua mamudhaakana
manga mia mosaalihi amembali akarajaa tee ala-
iani Kawasana Opu to apekatangkaaka badana Al
Masi, siitumo manga mia moosena Isa.

¹³ Tee mboo sumai bhari-bharikita taposaangu
i nuncana saangu iimani tee tapomatauaka tee
Ana moumbana minaaka i Aulata'ala, mamud-
haakana tamembali mia mo'aarifu, tee atoro-
torosu ajulu o iimanita mamudhaakana ingkita
tamembali tamondo mboomo Al Masi.

¹⁴ Sumaimo ingkita indamo tamembali
mboomo anaana ilengko-lengkona ewo
makaa tee mangabhawa pegiu-giuna ngaluna
kaadharina mia madhaki. Manga incia ako'akala

mamudhaakana apasaladhala mia tee apekatipu.

¹⁵ Maka ingkita tabeana takeniaka kabanara i nuncana kaasi, sabutuna bhari-bharia ipewauta samangengena sahandana amatangka mboomo momembalina bhaa, siitumo Al Masi mangakapalaikina.

¹⁶ Minaaka i Incia saangua bada sumai atosausau malape, tee apapoompua tee manga losuana saasaangu. Tee ande saasaangu parewana bada sumai aose tugasina sumbesumbere, sumaimo saangua bada ajulu amondo tee amatangka i nuncana kaasi.

Maanusia Bhaau

4:17-32

¹⁷ Rampaakanamo sumai tee saroni Kawasana Opu, iaku kupogauakea tee kuudhaniakakomiu: Bholimo udhadhi mboomo manga mia inda momatauna Aulata'ala, roonamo manga incia afikiriaka manga giu mosia-sia.

¹⁸ Fikirina manga incia amalalanda tee atogaati minaaka i dhadhi ipeeluna Aulata'ala. Giu incia sumai amembali roonamo kabhongo-bhongona, tee kabhongo-bhongona rampaakanamo amakaa incana.

¹⁹ Roonamo incana amakaamo, manga incia indamo anamisi kaea, sabutuna aose nawusuuna to apewau manga giu i'aebuaka tee amasibu.

²⁰ Maka mencuana tee manga pewau mboo sumai imataumiu pokaiana tee Al Masi.

²¹ Atantumo ingkomiu urango pokaiana tee Incia, tee iadhariakana pokaiana tee Incia mopokanana tee kabanara i nuncana Isa.

²² Pokaiana tee pewaumi i piamo itu, ingkomu padhamo upotibhaaka kaadhari mamudhaakana ubhanakea o maanusi miu momangenge, siitumo o fe'elimi momadhaki waku-tuuna uose manga kapeelu mobukeakana tee kagau-gau,

²³ mamudhaakana utopebhaaungi pendua i rohimu tee fikirimi,

²⁴ tee uka udhadhi mboomo maanusi mobhaau, motopadhaangiana mboomo kapeeluna Aulata'ala i nuncana kabanara tee kangkilo mototuu.

²⁵ Rampaakanamo sumai bholimo ugau-gau tee ujujurumo podho-podho ingkomu, roonamo ingkita podho-podho parewana badana Al Masi.

²⁶ "Ande u'amara, bholi upewau dosa." Bholi udhikaia o amarami sumai saeo,

²⁷ tee bholi udhawu kalalesa to Ibilisi awujukomi upewau dosa.

²⁸ Mia momenturuna momanako tabeana aunto amanako, salabhina incia akarajaa momalapena tee limana karon to apotibhaaka opea ifaraluuna tee mamudhaakana amembali ahamba mia mokakuranga tee momisikini.

²⁹ Bholi dhaangia o bhoasaka momarombu maka ubhoasakamo pogau mopekalanena mia mopokanana tee ifaraluuna, mamudhaakana mia morangoa apotibhaaka rahumati minaaka i pogau ibhoasakami sumai.

³⁰ Bholi upekaporo incana Rohina Aulata'ala Momangkilo tee fe'eli inda momalape. Roonamo Rohina Aulata'ala atandai karomi mboomo

saangu materai mosusuakana ande ingkomiu pewauana Aulata'ala tee bhemopasalaamatikomiu ande akawa o wakutuuna naile itu.

³¹ Bhanakamea bhari-bharia kapiina incamiu, amaramiu tee pamurumiu. Bholimo upogera-gera tee upopekamangkatu. Bholimo upewau giu madhaki podho-podho ingkomiu.

³² Maka ingkomiu tabeana amalape incamiu tee mia mosagaanana, upomaamaasiaka, tee upoma'ama'afuaka mboomo Aulata'ala a'amponikomiu i nuncana sarona Al Masi.

5

Tadhadhi i nuncana Kainawa

5:1-21

¹ Ingkomiu manga anana imaasiakana Aulata'ala, rampaakanamo sumai ingkomiu tabeana udhadhi tee kabanara tee umangkilo minaaka i bhari-bharia kasalaha, mboomo conto idhawuakana Aulata'ala.

² Dhadhimiu tabeana abukeaka kaasi, mboomo Isa Al Masi padhamo amaasiaka ingkita tee akurubaniaka karonu to ingkita, tee amembali pasombaa momawondu to Aulata'ala.

³ Maka bholi dhaangia moomini saidhe uka manga pewau mopokaina tee zinaa, ka'aebu, atawa o kasibu i tanga-tangamiu. Uumatina Aulata'ala mosaalihi inda alaenga apewau manga giu incia sumai moomini soo asarongia tee abhotoa.

⁴ Ingkomi u inda alaenga uka ubhoasaka manga pogau pasunda, pogau inda mokoguna, tee uba-hatikiaka pogau momarombu. Maka salabhina uemani sukuru i Aulata'ala.

⁵ Udhania umpuu-mpuu, roonamo ande manga mia mopewauna zinaa, manga mia mopewauna monaajisi, atawa o mia momasibu (manga mia mopewauna mboo sumai apokanamo tee asomba barahala), manga mia incia sii inda bheapotibhaaka tinauraka atawa apesua i nuncana Pamarintana Al Masi tee Aulata'ala.

⁶ Ancosala ingkomi utotipuaka manga pogau inda mokoguna, roonamo manga giumo incia sumai mosababuakana Aulata'ala apamuru tee manga mia modorohaka.

⁷ Rampaakanamo sumai bholi uposabhangka tee manga mia mboo sumai.

⁸ I piamo itu ingkomi udhaangia i nuncana kalalanda, maka sii-sii ingkomi umembalimo manga anana Kawasana Opu momboorena i nuncana kainawa. Rampaakanamo sumai, ud-hadhimo mboomo manga anana kainawa,

⁹ roonamo bhake ihasiliakana kainawa sumai bheaumbaaka sagala giuna kalape, ka'adili tee kabanara.

¹⁰ Usahamo to umatauaka opea imasanaakana incana Kawasana Opu.

¹¹ Bholi uose upewau manga karajaa mo-malalanda roonamo hasilina inda akobhakeaka kalape, salabhina ususuaka manga kasalahana.

¹² Roonamo to ingkita, manga giu ipewauna manga incia tee cara apobuniaka amembali giu motomaeaaka mpuu, sampe moomini soo ta-

pogauakea tanamisimo kaea.

¹³ Bhari-bharia giu isuluwina kainawa, bheatokamata tee atinda,

¹⁴ roonamo kainawa mopatokamatana bhari-bharia giu incia sumai. Rampaakanamo sumai o Kawasana Opu apogau,

"Bhangumo, e ingkoo mokolena;

dhadhimo pendua minaaka i mate,

Al Masi bheasuluwiko."

¹⁵ Sababuna sumai, kamatamea pekalape tuaapa o dhadhimiu, bholi mboomo manga mia inda moko'akala, maka tabeana mboomo manga mia mo'aarifu.

¹⁶ Pakea pekalape o wakutuu modhaangiana i karomiu, roonamo sii-sii abhari o mia mope-wauna kadhaki.

¹⁷ Rampaakanamo sumai bholi ukabhongo-bhongo, maka u'usahamo to umatauaka opea o kapeeluna Kawasana Opu.

¹⁸ Bholi upekalango-langoaka abhari angguru, roonamo giu incia sumai aumbaaka nawusuu tee bheapekadhakikomiu. Maka tabeana ingkomiu sadia akuasaikomiu Rohina Aulata'ala.

¹⁹ Wakutuuna upogau podho-podho ingkomiu ubhoasakamo pogau mominaakana i Zaburu, tee manga lagu kapujia atawa o lagu-lagu mosagaanana to upujiaka Aulata'ala. Ingkomiu tee ngangarandamiu mokaunde-undena tabeana ulaguakamo lagu kapujia to Kawasana Opu,

²⁰ upoose uemani sukuru to bhari-bharia giu i Aulata'ala o Amata, i nuncana sarona Isa Al Masi, Oputa Momalanga.

21 To uhoromatiaka Al Masi, ingkomiu tee mia mosagaanana tabeana upaporitambe karomiu.

*Kaasina Al Masi Amembali Saangu Hali Ikeni-
akana Umane tee Bhawinena*
5:22-33

22 E manga bhawine mokoumane, tungkumo i umanemiu mboomo utungku i Kawasana Opu.

23 Roonamo umane sumai amembali kapala to bhawinena, apokana tee Al Masi amembali kapalana jama'a, siitumo o badana, tee Incia uka mopasalaamatia.

24 Mboomo jama'a tabeana atungku i Al Masi, mboomo sumai uka manga bhawine i nuncana sagala hali tabeana atungku i umanena.

25 E manga umane mokobhawine, maasi-akea o bhawinemiu, apokana mboomo Al Masi amaasiaka jama'ana tee apasarakaaka karon a to jama'ana sumai.

26 Giu incia sumai apewaua mamudhaakana Incia amembali apekangkilo jama'ana sapadhana apekangkiloakea tee uwena kapebhahoka tee alaloi Firimanina,

27 mamudhaakana Incia amembali adhika jama'ana i aroana karon a tee kadhaangia momulia, inda tee kadhingkulana, inda tee balacina, atawa o giu mopokana tee hali incia sumai, maka mamudhaakana o jama'a sumai amangkilo tee inda tee kasalahana.

²⁸ Mboomo uka manga umane mokobhawine, manga incia tabeana amaasiaka bhawinena mboomo amaasiaka badana karona. Incema momaasiakana bhawinena, incia amaasiaka karona.

²⁹ Roonamo inda dhaangia o mia mobancina badana karona, maka incia bheapakandea tee adhambaakea, tee mboo sumai uka ipewauna Al Masi to jama'ana.

³⁰ Roonamo ingkitamo jama'a sumai tee mboomo manga parewa mominaakana i badana Al Masi.

³¹ I nuncana Kitabi Momangkilo atoburi, "Rampaakanamo sumai, samia umane bheabholi amana tee inana to adhadhi apobhawa-bhawa tee bhawinena, sabutuna rua-rua miaia amembali saangu bada."

³² Aeati incia sii amandala mpuu o ma'anana, maka ipogauakaku siitumo pokaiana Al Masi tee jama'ana.

³³ Tee mboo sumai, bhari-bharikomiu tabeana umaasiakea o bhawinemiu mboomo umaasiaka karomiu samia, mboomo uka manga bhawine mokoumane tabeana ahoromatia uka o umanena.

6

Kata'ati tee Kaasi

6:1-9

¹ E manga anaana, osea o parintana mancuanamiu i nuncana saroni Kawasana Opu, roonamo giumo incia sii mobanarana ipewaumiu.

² I nuncana Kitabi Momangkilo dhaangia tee parinta mboo sii, "Horomatia o ama tee inamiu." Parinta incia sii satotuuna o parintana Aulata'ala mobhaa-bhaana apapooseakea tee janjina mboo sii,

³ "mamudhaakana amalape dhadhimu tee amarambe umurumu i dunia sii."

⁴ E manga witinai momembalina ama! Bholi uumbaaka amara i nuncana ngangarandana manga anamiu, maka manga incia tabeana upekaogeakea kaadhari tee naasehati mominaakana i Kawasana Opu.

⁵ E manga witinai momembalina bhatua, ta'atia manga parintana opumiu i dunia sii; umaekaia tee uhoromatia, sabutuna ulaiania tee relana totona incamiu apokana mboomo uta'ati tee Al Masi.

⁶ Bholi tangkanamo soo i aroana atawa i wakutuuna opumiu akamatakomi kasiimpo utotuu-totuu ukarajaa malape mamudhaakana upasanaa incana manga opumiu, maka ingkomiu o bhatuana Al Masi, sumaimo ingkomiu tabeana ukarajaa tee mpuu-mpuuna incamiu mboomo kapeeluana Aulata'ala,

⁷ tee totona incamiu urela ukarajaaia mboomo ingkomiu ulaiani Kawasana Opu, mencuana ulaiani maanusia,

⁸ roonamo umataua ande o Kawasana Opu bheabalasi bhari-bharia amala momalape ipewauna maanusia, malape incia samia bhatua atawa samia maradhika.

⁹ E manga witinai momembalina opu! In-
gkomiu tabeana upewau malape tee bhatuamiu,
tee bholi uhanda-handea manga incia, roonamo
umataua ande o Kawasana Opu na manga incia
tee Kawasana Opumi modhaangiana i sorogaa
sumai apokana, tee Incia inda apaposala-sala mia
minaaka i rouna.

Kamondona Baatini

6:10-20

¹⁰ Aahirina ingkomiu tabeana umakaa i nun-
cana Kawasana Opu tee i nuncana kuasana mo-
matangka.

¹¹ Pakemea bhari-bharia o kamondona potim-
bea idhawuakana Aulata'ala, mamudhaakana
ingkomiu umembali upotaangi wakutuuna ue-
wangi haejatina Ibilisi momadhaki.

¹² Roonamo iewangita sii mencuana tabhali
maanusia, maka tabhali manga rohi madhaki tee
manga kuasa moparintana manga rohi madhaki
sumai, tee tabhali manga seetani mokuasaina
maanusia i nuncana kalalanda, tee uka manga
rohi momadhaki momboorena i laiana.

¹³ Rampaakanamo sumai, pakemea bhari-
bharia o kamondona potimbea idhawuakana
Aulata'ala to ingkomiu, mamudhaakana
ingkomiu umembali upotaangi i wakutuuna
eo momadhaki sumai, tee mboo sumai ingkomiu
umembali usadhaadhaa ukakaro sakawana
bhari-bharia sumai apadha.

¹⁴ Jadi ukakaromo pekatangka. Tee upakemo
kabanara upamembalia kabhokena tangamiu,
ka'adili upamembalia bhaju asemui,

¹⁵ tee usiapumo to upakoleleaka Lele Malape mobawana dhadhi malape amembali kalam-pesina aemiu.

¹⁶ Sapadhana incia sumai, sadiamo upake katangkesi, siitumo iimani, roonamo tee katangkesi incia sumai ingkomiu bheumembali usowu bhari-bharia pana mokowaa minaaka i Ibilisi.

¹⁷ Sapadhana sumai, tarimamo topi ase siitumo kasalaamatimiu, tee upakemo hancuna Rohi siitumo firimanina Aulata'ala.

¹⁸ Udo'amo i wakutuuna ingkomiu upewau bhari-bharia sumai tee uka uemanimo i Aulata'ala mamudhaakana atulungikomiu. Saeoa tabeana sadia udo'a i Rohina Aulata'ala, tee mboo sumai umembali upojagani i nuncana bhari-bharia kadhaangia tee bholi uunto udo'a maka udo'amo torosu. I wakutuuna ingkomiu udo'a, udo'aakea uka to bhari-bharia uumatina Aulata'ala mosaalihi.

¹⁹ Do'aakaaku uka, mamudhaakana o Aulata'ala arahumatiakaaku pokaiana tee pogau opea bheibhoasakaku. Do'amo mamudhaakana kubarani kupakawaaka kabanara modhaangiana i nuncana Lele Malape indapo imatauna mia.

²⁰ Rampaakanamo kutoparacaea kupakoleleaka Lele Malape incia sii, iaku kutotorongku tee kutoranteaka ase. Do'aakaakumo mamudhaakana wakutuuna kupakawaaka Lele Malape incia sii kubarani kupogauakea mboomo laengana.

*Salamu**6:21-24*

²¹ Mamudhaakana ingkomiu umembali umataua o kadhaangiaku tee opea ipewauku, sumaimo Tikhikus bhemopaumbaakakomiu. Incia o witinai imaasiakata, tee o mia molaianina Al Masi momembalina motoparacaea i nuncana saronu Kawasana Opu.

²² Rampaakanamo sumai incia kulambokoa to ingkomiu, mamudhaakana umataua o kadhaangiamami tee mamudhaakana incia uka amembali ahiburu ngangarandamiu.

²³ E manga witinai, to ingkomiumo dhadhi malape tee kaasi motopapoosena tee iimani minaka i Aulata'ala Amata, tee aminaaka i Isa Al Masi, Oputa Momalanga.

²⁴ Rahumatina Aulata'ala apoose tee bhari-bharia mia momaasiakana Isa Al Masi Oputa Momalanga tee kaasina molagina.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

7df9af1f-1c49-59d2-a164-bde0a20127b3